



Sesida dal

1. settember 2020

Communitgà ils

7 da settember 2020

Protocol nr.

712

Dumonda Loi

concernent las surdadas da las lavurs vi dal tunnel d'Arosa da la Viafier retica

Resposta da la Regenza

Il 28 da november 2019 ha la Viafier retica SA publictà las lavurs d'impresari per la reparaziun dal tunnel d'Arosa tenor GATT/WTO conform a la lescha. Cun la decisiun dals 3 d'avrigl 2020 ha la Viafier retica surdà las lavurs publicgadas a la Heitkamp Construction Swiss ScRL, che aveva inoltrà l'offerta economicamain la pli favuraivla. Cunter la disposiziun da surdada ha la cuminanza d'offerents ch'era sin il segund rang, fatg recurs tar la Dretgira administrativa dal chantun Grischun. La Dretgira administrativa ha refusà la dumonda da conceder in effect suspensiv ed ha constatà a prima vista che l'interpresa agiuditgada para d'observar ils criteris da qualificaziun resp. che l'autorità da surdada ha validà correctamain quests criteris. Sin basa da quai ha la recurrenta retratg ses recurs, uschia che la procedura è vegnida stritgada pervia da mancanza d'object, e la surdada ha survegnì forza legala.

Tar la dumonda 1: La Regenza vegn infurmada posteriuramain davart las lavurs surdadas da la Viafier retica en il rom da la statistica legala da submitsiun tenor l'art. 34 da la Lescha da submitsiun (Lsub; DG 803.300). Independentamain da quai stat il chantun en in stretg contact cun la Viafier retica, perquai ch'ella consultescha regularmain il post da submitsiun per scleriments correspundents.

Tar la dumonda 2: Na, la Regenza na va da princip betg d'accord cun questa interpretaziun. Tenor la pratica da la Dretgira administrativa ha il criteri dal pretsch l'impurtanza la pli gronda. Sco regla generala po valair en quest connex: pli simpel ch'il grad da difficultad d'ina incumbensa è, e dapli impurtanza ch'è d'attribuir al pretsch. En cas d'incumbensas d'ina cumplexitad mesauna na duess l'impurtanza dal pretsch per regla betg importar main che 50 pertschient, quai ch'è usitadamain il cas tar incaricas da construcziun (sco incaricas da standard). En il rom da la submitsiun da talas lavurs da construcziun applitgescha la Viafier retica mintgamai ina impurtanza da 60 pertschient per il criteri dal pretsch.

Criterion esters a l'aggiudicaziun – sco la domiciliaziun al lieu, il domicil fiscal u l'utilisaziun da products indigens – n'èn betg criteris admissibels per pudair divergiar da la purschida economicamain la pli favuraivla. En cas d'offerentas qualitativamain equivalentas sto – tenor la giurisdicziun permanenta – l'offerta pli favuraivla survegnir obligatoricamain l'aggiudicaziun, er en cas d'ina pitschna differenza da pretsch. La concessiun d'ina libertad da decider entaifer tschertas limitas da toleranza, sco quai ch'ella vegn proponida en la dumonda, vegniva pratigada fin en ils onns 1990, n'è dentant betg pli admissibla tenor il dretg vertent. Tenor las statisticas chantunales d'acquisiziun èn dal rest vegnidas surdadas mintga onn tut en tut main che 2 perschient da tut las incaricas publicas en il chantun Grischun ad offerents da l'exteriur. En spezial en l'industria principala da construcziun èn ultra da quai vegnidas surdadas passa 90 perschient da las incaricas ad offerents grischuns. Quai mussa pia che las interpresas indigenas pon far frunt a la concorrenza.

Tar la dumonda 3: Ils 15 da november 2019 han ils chantuns deliberà unanimamain la revisiun da la Cunvegna interchantunala davart las acquisiziuns publicas (CIAPrev) per mauns da la procedura da participaziun chantunala. Il nov dretg da concordat sa focusseschia pli fitg sin qualitad, duraivladad ed innovaziun. Als posts d'acquisiziun sa porschan perquai instruments pli adattads per tegnair quint dals interess dals offerents svizzers orientads al martgà naziunal. Ils chantuns vulan exequir lur acquisiziuns sut cundiziuns da concorrenza e duvran cun quità ils daners da taglia disponibels sco er profitar en quest connex – cun pauca lavur administrativa en proceduras chapaivlas – da las novas libertads d'agir cun las novas finamiras. Da las fermezzas dal mastergn indigen vegni uschia tegnì quint il meglier cun surdar incaricas dal maun public. Sin fundament da quai na vesa la Regenza nagin ulteriur basegn d'agir.

Tar la dumonda 4: Questa pretensiun vegn tractada correspondentamain en la revisiun menziunada da la CIAP. La CIAPrev metta il focus sin ina pratica d'acquisiziun dal maun public ch'è duraivla ed innovativa e che s'orientescha a la qualitad. La Regenza è persuadida ch'i vegn – grazia al nov dretg d'acquisiziun dals chantuns – tegnì quint anc meglier da las fermezzas dals offerents indigens.



En num da la Regenza

Il president:

Il cancellier:

Dr. Chr. Rathgeb

Daniel Spadin